

KU DHAQAN XAFIIS DAWLADEED



Faafin Rasmi ah

EE JAMHURIYADDA DIMUQRADIGA SOMALIYA

Sannadka 2aad

Muqdisho, 1 Deshembre 1974

L. 12

Laanta Maamulka Faafinta Rasmiga ah
ee ka tirsan Madaxtooyada Golaha Sare ee Kacaanka

FAAFIN BIL SOO BAXA

QIIMADU: waa 5 shilin lambar waliba — RUKUNKA: Sanadii waa Sh. 100 Samaliya gudeheeda — Dibaddedana waa Shs. 300. Rukunka la weydiisto waqtiga loo gooyay wuxuu ka bilabnaa 1 Janayo. Qiimaha qoritaanku F. R. halkii sadar iyo waxii ka yar waa 2 laba shilin — Rukunka iyo qoritaanku waxaa la weydiistaa Laanta Maamulka Faafinta Rasmiga ah — Lacagta waxaa lagu bixinaya Xafiiska Canshuraha ee Wasaaradda Lacagta

KOBNIIN

BOGGA KOOWAAD

S H A R C I

SHARCI L. 47, Tr. 23 Oktoobar 1974 — *Sharciga Jaamaacadda.*

Bog. 533

BOGGA LABAAD

X E E R

XEER MADAXWEYNAHA GOLAHA SARE EE KACAANKA, Tr. 24 Oktoobar 1974, L. 127 — *Xeerka maamulka gudaha ee Jaamaacadda Ummadda.*

» 543

XEER WASAARADDA GANACSIGA GUDAHA, Tr. 14 Nofembre 1974, L. 128 — *Qiimaha dhuxusha geedaha.*

» 555

XEER WASAARADDA BOOSTA IYO ISGARSIIINTA, Tr. 18 Nofembre 1974, L. 129 — *Tigidh cusub «sannad-guurada Saad ee Kacaanka.*

» 556

BOGGA LABAAD

X E E R

XEER MADAXWEYNAHA GOLAHA SAHE EE KACAANKA

Tr. 24 Oktoobar 1974, L. 127.

Xeerka Maamulka Gudaha ee Jaamacadda Ummada.

MADAXWEYNAHA

GOLAHA SARE EE KACAANKA

ISAGOO ARKAY Xaashidii 1aad, tii 2aad iyo Sharciga 1aad ee 21 Oktoobar 1969;

ISAGOO ARKAY Sharciga Jaamacadda Qod. 30aad ti.sigiisu yahay 47 ee 23-10-1974;

ISAGOO OGSOON Baahida loo qabo in la dejiyo Xeer Saameeya Maamulka Gudaha ee Jaamacadda;

ISAGOO la Tashaday Xoghayaha Dowladda.

WUXUU XEERAYAA

Qaybta I.

UJEEDOYINKA SHARCIGAN

Qodobka 1aad

Ujeedooyinka Guud

Xeerkani wuxuu saameynayaa arrimaha gudaha ee Jaamacadda gaar ahaana:

- a) Waajibaadka ardayda saaran;
- b) Habaynta sannadka tacliinta, fasaxyada iyo dejinta barnaamijka waxbarashada;
- t) Shuruudaha gelliinka Jaamacadda;
- j) Tirada imtixaanka iyo habka loo qaadayo;

- x) Edbinta iyo fulinta xeerka usluubta;
- kh) Iyo arrimo kale.

Qodobka 2aad

Xeerkan ka sokow, Jaamacaddu waa iney u hogaansanto sharciyada iyo xeerarka dawladda ee gaar u noqon kara.

Qaybta II.

QODOBBO GUUD

Qodobka 3aad

Imaatinka Casharrada

1. Arday kasta waxaa waajib ku ah inuusan sabab la'aan uga maqnaan casharrada waxbarashada, qaybaha kale ee barnaamijka waxbarashada iyo wixii kale ee la xiriira;
2. Xafiiska Hormuudka Kulliyad walba waxaa lagu haynayaa Buug lagu sajiilo siday ardaydu u timaado casharrada.
3. Arday kasta oo aan casharrada tegin sabab waafi ah la'aanteed, waxaa lagula dhaqmayaa qodobbada ku sheegan qaybta 8aad ee Xeerkan.

Qodobka 4aad

Beddelka Takhasuska Waxbarashada

1. Beddelka Takhasusuka Waxbarashada waxaa la soo qoran karaa sannadka hore iyo kan labaad kali ah. Ogolaanshada bedelaadda waxaa leh Golaha Tacliinta oo dhagaysta ra'yiga Guddiga Kulliyadda.
2. Ardayga waxaa loo ogolaan karaa inuu ka baxo Jaamacadda markuu Guddi Takhtar uu ka keeno marag fur caddaynaya inuusan jirro awgeed u wadan karin tacliintiisa.
3. Ardayga uga taga Jaamacadda sabab aan ahayn tan kor ku sheegan, waxaa laga doonayaa wixii kharash Dawladda kaga baxay.
4. Xoghayaha Dawladda wuxuu, mar walba awood u leeyahay inuu arday u ogolaado inuu ka baxo Jaamacadda, isagoo dhagaystay talada Golaha Tacliinta ee Jaamacadda.

Qodobka 5aad

Ka Tirsanaan

Ardayna looma ogoola inuu isku qoro Kulliyad wax ka badan ama inuu imtixaan ugu fadhiisto kale isagoon fasax ka haysan Hormuudka.

Qaybta III.

SANNADKA TACLIINTA

Qodobka 6aad

Haddii sharci ama xeer kale lagu beddelin, muddada tacliinta Jaamiciga ahi waa inayan ka yaraan afar sano oo tacliineed sida Qod. 7aad ku tilmaaman.

Qodobka 7aad

Sannadka Tacliinta

1. Sannadka tacliintu wuxuu ka kooban yahay laba kal (Semestre) oo ka hore yahay 22 toddobaad, ka labaadna yahay in ku dhow 24 toddobaad.

2. Kalka hore wuxuu billabmayaa 16kaa Agoosto, wuxuuna Dhammaanayaa 17ka Jenaayo.

3. Kalka labaad wuxuu bilaabmayaa 1da Febbrayo, wuxuuna dhammaanayaa 16ka Luuliyo.

Qodobka 8aad

Tacliinta Todobaad

Haddii aanu sharci ama xeer kale beddelin, tacliinta todobaadku, waxna ay tahay lix maalmood (6) oo mid walba ugu bacnaan todoba (7) saacadood ka kooban tahay.

Qodobka 9aad

Fasaxa Tababarka

1. Waxaa jiraya fasax (6) todobaad ah, wuxuuna u qaybsamaa sida hoos ku dhigan:

- b) Nasasho 4 todobaad ah ee la qaadanyo sannadka tacliintayo.
- b) Nasasho 4 todobaad ah ee la qaadanyo sannadka tacliinta dhammaadkiisa; 17ka Luuliyo ilaa 15ka Agoosto.

Qaybta IV.

GELIDDA JAAMACADDA

Qodobka 10aad

Guddiga gelidda Jaamacadda

Ogolaanshaha gelidda Jaamacadda waxaa awood u leh Golaha Tacliinta sida ku tilmaaman Qod. 8aad xarafka (kh) ee sharciga tirsigiisu yahay 47 ee 23-10-1974, (Sharciga Jaamacadda Ummadda Soomaaliyeed). liyeed).

Qodobka 11aad
Shuruudda Gelidda

Shuruudda gelidda Jaamacadda waa kuwa guud iyo kuwa tacliineed.

Qodobka 12aad
Shuruudaha Guud

Shuruudaha guud ee gelidda waxay yihin kuwa hoos qoran:

- a) Dhalasho Soomaaliyeed;
- b) Dhammays Shaqada Qaranka;
- t) Shahaado caafimaad qab ah;
- j) Shahaado edeb sami ah.

Qodobka 13aad
Shuruudaha Tacliineed

Shuruudaha tacliineed ee gelidda Jaamacaddu waxay yihiin:

- a) Shahaadada Dugsiga Sare ama mid la mid ah.
- b) Dhammayska Tababarka Dugsiga Hanuuninta ee Xalane ama hawl u dhiganta.
- t) Ku guuleysi imtixaannda Jaamacadda.

Qodobka 14aad
Dhaafid Shuruudaha Qaarkood

1. Shuruudaha tacliineed ee ku tilmaaman Qod. 13aad qaybta (a) iyo Qod. 12aad ee xeerkan qaybta (b) waxaa laga dhaafayaa dadka Jaamacadda ka qaadanaaya tacliin gaar (Special Courses).

2. Shuruudaha guud ama-iyo kuwa tacliineed waxaa laga dhaafi karaa dadka shisheeyaha ah ee loo ogolaado Jaamacadda inay galaan.

Qaybta V.

HABKA GELIDDA JAAMACADDA

Qodobka 15aad

Ardayda doonaysa inay gasho Jaamacadda waxaa laga rabaa in ay u keenaan Diiwaaniyaha Jaamacadda (Register) laba bilood ka hor intaan sannadka tacliintu billaabmin, fooman buuxa ayagoo fulinaya shuruudaha ku tilmaaman qodobbada 12aad iyo kan 13aad ee xeerkan.

Qodobka 16aad

Sugidda Xaashiyaha (Forms)

Kolka foomamka iyo xaashiyaha kaleba ay Jaamacadda soo gaa-raan, Diiwaaniyaha (Registrar) wuxuu sugayaa in xaashiyuhu ay hagaagsan yihiin, markaas ka dib, ayuu u gudbinayaa Guddiga Gelidda Jaamacadda ee lagu tilmaamay qod. 10aad ee Xeerkan.

Qodobka 17aad

Hawsha Guddiga Gelidda Jaamacadda

1. Guddiga Gelidda Jaamacadda wuxuu mar labaad sugaysa xaashiyaha (Forms), wuxuu dhejinayaa imtixaannada gelidda ee loo baahan yahay; wuxuuna korjoog ka noqon doonaa sixidda imtixaannada.

2. Marka sixidda imtixaannadu ay dhammaato, waa in guddiga Gelidda soo saaraan magacyada ardada guulaysatay iyo kulliyadaha ay gelayaan.

Qaybta VI.

SAJILAAD

Qodobka 18aad

Muddada Sajilaadda

1. Ardayda ku guulaysatay imtixaannadii Gelidda Jaamacadda, waa in ay iska sajilaan Xafiiska Diiwaaniyaha (Register) hal todobaad ka hor intaanu billaaban Sannadka Tacliinta.

2. Arday kasta waxaa laga rabaa inuu bixiyo qiimaha sajilaadda oo ah Sh. So. 50 (Konton).

Qodobka 19aad

Tifaftirka Sajilaadda

Marka ay sajilaaddu socoto, ardayga waxaa laga rabaa inuu la yimaado:

- a) Magac buuxa;
- b) Jinsi iyo da'da;
- c) Heerka aqooneed;
- d) Wixii war bixin kale ah.

Qodobka 20aad

Sajilaad La'aan

1. Ardayga aan isa-sajilin muddadalagu sheegay xeerkan, dibna

uga dhaca bilowga Sannadka Tacliinta isagoon sabab waafi ah keenin, loo oggolaan maayo inuu Jaamacadda galo.

2. Ayadoo ay jirto arrinta kor ku tilmaaman, Guddoomiyaha Jaama cadda wuxuu awood u leeyahay inuu u oggolaado gelidda Jaamacadda, ardayga sabab waafi ah keena, haddii uu dib dhaco ilaa bisha Agoosto 30keeda.

3. Xoghayaha Dawladdu wuxuu awood u leeyahay inuu amro marka loo baahan yahay qaadasho ardo cusub oo kulliyadaha gasha bi-lowga sannadka tacliinta ka dib.

4. Ardayda cusub marka la qaadano, waxaa la raacayaa habka ku dejisan Qaybta VI ee Xeerkan.

Qaybta VII.

IMTIXAANNADA

Qodobka 21aad

Tirada Imtixaannada

1. Waxaa jiraya, ugu yaraan, imtixaannada hoos ku qoran:
 - a) Imtixaanka kalka (Semester Exam.);
 - b) Imtixaanka sannadka (Yearly Exam.);
 - t) Imtixaanka dhexe (Sannadka labaad dhammaadkiisa) (Comprehensive Exam.);
 - j) Imtixaanka ugu dambeeya (Final Exam.);
 - x) Doodda Qalin-Jebinta (Graduation Thesis).
2. Imtixaannada kor ku tilmaaman ka sokow, waxaa jiri kara tija-booyin (Tests) oo barayaashu qaadi karaan.

Qodobka 22aad

Xilliyada Imtixaannada

Haddii aan sharci ama xeer beddelin, imtixaannada ku sheegan Qod. 21aad ee xeerkan, waxaa loo qaabanayaa sida soo socota:

1. Imtixaannada kalka — oo dhici doona kalka dhammaadkiisa.
2. Imtixaannada sannadka — oo dhici doona dhammaadka sannadka hore iyo kan saddexaad.
3. Imtixaanka dhexe — oo dhici doona sannadka labaad dhammaadkiisa.
4. Imtixaanka ugu dambeeya — oo dhici doona sannadka afraad dhammaadkiisa.
5. Dooda qalin jebinta — ka dabeysa imtixaanka sannadka afraad.

Qodobka 23aad

Nooca Imtixaannada

- a) Imtixaannada kalka iyo sannadka waxay ahaanayaan kuwo koraal ah.
- b) Imtixaannada dhexe iyo kuwa ugu dambeeya (Filan) waxay ahaanayaan kuwo qoraal ah. Waxaa raaci kara kuwo tiraab ah (Oral).

Qodobka 24aad

Imtixaan Qaadistu

1. Imtixaannada ku sheegan Qod. 21aad ee Xeerkan waxaa loo qaadi doonaa sida hoos ku dhigan:

- a) Imtixaannada kalka waxaa qaadaya barayaasha Kulliyadda.
- b) Imtixaannada Sannadka waxaa qaadaya barayaal uu magacaabo Guddiga Kulliyaddu.
- t) Imtixaannada dhexe, Golaha Tacliinta ayaa u magacaabaya Guddi Kulliyad kasta.
- j) Imtixaanka ugu dambeeya — waxaa qaadaya Guddi uu magacaabo Golaha Tacliintu.

2. Tirada iyo Xubnaha Guddiyda Imtixaannada ee kor ku tilmaan iyo habka loo raacayo waxaa goynaya Golaha Tacliinta.

3. Wasaaradda Hiddaha iyo Tacliinta Sare waxay awood u leedahay inay magacawdo qof ka tirsan ayada oo goob-joog noqda marka imtixaannada la qaadayo.

Qodobka 25aad

Mahuraanno Dheeraad ah

- a) Ardayda imtixaannada ugu dambeeya (Final) dhiiba, waxaa laga doonayaa dood qalin jebis ah oo la'aanteed aan la qaadan karin shahaadad Jaamici ah.
- b) Dooda qalin jebinta ee kor ku sheegan waxaa la hor dhigayaa Guddi uu magacaabo Golaha Tacliintu kaas oo uu Guddoomiye ka noqonayo Hormuud.
- t) Guddigu wuxuu shaaca ka qaadi-doona go'aannadiisa oo aan kama dambays.

Qodobka 26aad

Qiimaynta Imitixaannada

Qiimaynta imitixaannada waxay noqon doonaan sidan hoos ku dhigan:

a)	A	Aad u fiican (excellent)	100 — 85
b)	B	Fiican (Credit)	84 — 75
t)	T	Ku filan (Satisfactory)	74 — 60
j)	J	Guul la'aan (Failure)	59 — 0

Qodobka 27aad

Ku Guulaysiga Imitixaannada

1. Ardayga waxaa laga rabaa inuu imitixaannada kalka uu ugu yaraanka helo 60% meel-dhexaad maadadaha oo dhan.

2. Imitixaannada sannadka, ardayga waxaa laga rabaa isagoo ku gudbay maadadaha Guddiga Kulliyaddu ay u garatay kuwa madhaafaanka ah (Core Subjects) 70% inuu maadadaha kale oo dhan 60% oo

Qodobka 28aad

Magudbayaasha Imitixaannada Kalka

1. Ardaygii ku dhaca hal maado imitixaannada kalka, waxaa loo oggol yahay inuu imitixaanka, mar kaliya dib u qaato. Kadib hadduu ardaygu dhaco, waxaa dib loo celinayaa hal kal oo kale.

Qodobka 29aad

Magudbayaasha Imitixaannada Sannadka

1. Ardaygii imitixaannada sannadka ku dhaca ama dhammaan maadadaha madhaafaanka ah isla markaasna ka gudba maadadaha kale, waxaa dib loo celinayaa hal kal.

2. Ardayga imitixaannada sannadka ka gudba maadadaha madhaafaanka ah, keenay in ka hoosaysa meeldhexaadka maadadaha kale 60%, waxaa loo oggolaanayaa inuu dib u qaato maadadaha uu ku dhacay sannadka tacliinta ee ku xiga ka markaas dhammaaday.

3. Ardayga ku dhaca maadadaha madhaafaanka ah ee imitixaannada sannadka ee isla markaasna keeni waaya meeldhexaadka 60% maadadaha kale, waxaa dib loo celinayaa sano tacliineed.

Qodobka 30aad

Magudbayaasha Imitixaannada dhexe, kuwa ugu dambeeya

iyo dooda qalin jebinta

1. Ardayga ku dhaca imitixaannada Dhexe ama kan ugu dambeeya waxaa dib loo celinayaa sannad tacliineed.

2. Ardayga la yimaada dood qalin jebin oo an heerkii la rabay gaarsiisnayn waxaa laga doonayaa inuu mar kale ku noqdo.

Qodobka 31aad

Mar labaad dhicidda

1. Ardaygii kari waaya inuu ka gudbo imtixaannada ama dooda qalin jebinta mar labaad sida ku tilmaaman Qodobka 29 iyo 30aad ee Xeerkan, waxaa marka laga eryayaa Jaamacadda.
2. Xafiiska Diiwaaniyuhu wuxuu ardaygaas siinayaa marag furinta sano ee uu Jaamacadda ku jiray.

Qodobka 32aad

Ogaanshaha Go'aannada Imtixaannada

Go'aannada imtixaannada waxaa shaaca ka qaada Xafiiska Diiwaanka ee Jaamacadda.

Qaybta VIII.

USLUUBTA

Qodobka 33aad

Eris — Joojin

Arday wuxuu ku mutaa eris laga eryo Jaamacadda ama uu ka joojin markey:

- a) Maxkamadi ku caddayso dambi;
- b) Tahay ciqaab edbis ah sida qodobbada xeerkani dhigayo.

Qodobka 34aad

Guddiyada Edbinta

1. Waxaa loo xil saaray edbinta ardayda Guddiyada ku dhiigan:
 - a) Guddiga Edbinta ee Kulliyadda;
 - b) Guddiga Sare ee Edbinta ee Jaamacadda.
2. Ardayga aan oofin ama jebiya qodob ka mid ah qodobbada xeerkan waxaa tallaabooyin edbin ah ka qaada Guddiyada ku tilmaan xubinta 1aad ee qodobkan.

Qodobka 35aad

Guddiga Edbinta ee Kulliyadda

1. Guddiga Edbinta ee Kulliyadda wuxuu ka kooban yahay Hormuudka, 3 Bare oo kuwa Kulliyadda iyo laba (2) xubnood oo ka tirsan Golaha Ardayda ee Kulliyadda. Barayaasha waxaa magacaabaya Hormuudka, Ardayda waxaa soo dooranaya Golaha ardayda ee Kulliyadda.
2. Guddigu wuxuu lahaanayaa Xoghaye uu magacaabo Hormuudka Kulliyadda.

3. Guddiga Edbinta ee Kulliyaddu wuxuu fariisanayaa maalinta loo baahdo.

Qodobka 36aad

Guddiga Sare ee Edbinta

1. Guddiga Sare ee Edbinta ardayda wuxuu ka kooban yahay Hormuudyaalka Kulliyadaha, waxaana Guddoonshe ka ah Hormuudka Kulliyadda Sharciga.

2. Guddiga waxaa Xoghaye u ah Diiwaaniyaha (Register).

Qodobka 37aad

Awoodda Guddiga Edbinta ee Kulliyadda

Guddiga Edbinta ee Kulliyaddu wuxuu awood u leeyahay in uu ardayga ku xukumo:

- a) Canaan;
- b) Digniin;
- t) Joojin tacliinta Jaamacadda muddo aan ka badnayn hal kal;
- j) Magdhow — waxyeellada uu u geysto qalabka Jaamacadda;
- x) Ka joojin imtixaannada kalka iyo Sannadkaba.

Qodobka 38aad

Awood Guddiga Edbinta Sare

Guddiga Edbinta ee Jaamacadda wuxuu awood u leeyahay ciqaabaha hoos ku dhigan:

- a) Ka joojin tacliinta Jaamacadda intii ka badan muddo kal ah;
- b) Ka joojin imtixaan gelida hal kal;
- t) Ka joojin imtixaannada Dhexe ama/iyo kuwa ugu dambeeya;
- j) Ka saarid.

Qodobka 39aad

Habka Fiirinta Dacwadaha

Habka hoos ku qoran ayaa labada Guddi ku fiirin doonaan dacwadaha edebta:

- a) Xoghayaha Guddiga Edebta ayaa qoris ku wargelinaya ardayga dambiga lagu haysto iyo ciqaabaha uu mutaysan karo. Wuxuu u sheegayaa ardayga taariikh iyo waqti go'an uu hor yimaado Guddiga;
- b) Marka Guddigu kulmo, ayaa Xoghayuhu u akhriyi doonaa ar-

dayga dacwadda lagu haysto. Waxaana la weydiinayaa inuu qiran yahay iyo in kale.

- t) Hadduu ardaygu qirto dambiga, Xoghayaha ayaa dhigaya qira-shadaas;
- j) Hadduu qiran waayo, waxaa la siinayaa ardayga fursad uu isku daafaco;
- x) Marka la dhagaysto ardayga, Guddigu gaar ahaan ayuu garta u naqayaa;
- kh) Go'aannada labada Guddi ee Edbinta waa kama dabayn.

Qodobka 40aad

Go'aannada Guddiga

Guddigu go'aanka wuxuu ku gaarayaa nin-dheeri, ka dibna waxaa la ogeysiinayaa ardayga go'aanka uu Guddigu gaaray.

Qodobka 41aad

Ciqaabaha Guddiga Kulliyadda

1. Ciqaabaha ku sheegan xubnaha (a) iyo (b) Qodobka 37aad (Caanaan iyo Digniin) waxaa lagu xukumi karaa ardayga iyadoo ka xiran tanay culayska dambigiisa marka:

- a) Tacliinta laga maqnaado, sabab la'aan muddo laba saacadood oo isku xigta;
- b) saacadaha casharrada oo la gashado dhar aan ahayn kan Jaamacadda haddii uu jiro.

2. Ciqaabta ku sheegan xubinta (t) (Joojin tacliinta muddo aan ka badnayn hal kal ee Qodobka 37aad waxaa ardayga lagu xukumi karaa iyadoo ku xiran tahay culayska dembiga, marka uu galo dembi ah:

- a) Caasinimo cad;
- b) Ogolaanshaha ku dhicidda martida aan la ogolayn;
- t) Wareejiinta xaashiyaha rasmiga ah ama hallayntooda;
- j) Ku kaca dhaqdhaqaaq waxyeellaynaya nolosha Tacliinta iyo Bulshada ee Jaamacadda;
- x) Gelid la'aan, iyadoo sabab waafi ihii jirin, imtixaannada loo baahan yahay.

3. Ciqaabta ku sheegan xubinta (j) (Gudista khasaarada la gaarsiiyo qalabka Jaamacadda) ee Qodobka 37aad waxaa lagu xukumi karaa iyadoo ku xiran tahay culayska dembiga marka waxyeello la gaarsiiyo qalabka Jaamacadda.

4. Ciqaabta ku sheegan xubinta (x) (ka joojin imtixaannada kalka iyo sannadka) ee Qodobka 37aad waxaa ardayga lagu xukumi karaa,

iyadoo ku xiran tahay culayska dambiga marka imtixaannada noocaas ah ardaygu xado ama khiyaamo.

Qodobka 42aad

1. Ciqaabta ku sheegan xubinta (a) ee Qodobka 38aad (ka joojin Jaamacadda muddo ka badan hal kal) waxaa ardayga lagu xukumi karaa, iyadoo ku xiran tahay culayska dembiga marka:

- a) uu ardaygu ku galo imtixaannada kalka iyo sannadka magac aan ahayn kan sajiilan;
- b) Dib u gal dembiyada ku sheegan qaybaha (2), (3) iyo (4) ee Qodobka 40aad ee Xeerekan.

2. Ciqaabta ku sheegan xubinta (b) ee Qodobka 38aad (ka joojin imtixaanka kal) waxaa ardayga lagu xukumi karaa, iyadoo ku xiran tahay culayska dembiga marka uu:

- a) Siro imtixaannada Dhexe;
- b) Ku galo imtixaanka Dhexe magac aan ahayn kan sajiilan.

3. Ciqaabta ku sheegan Xubinta (t) ee Qodobka 38aad (ka joojin imtixaannada Dhexe iyo kuwa ugu dabeeya) waxaa ardayga lagu xukumi karaa markuu siro imtixaannada Dhexe ama kuwa ugu dambeeya.

4. Ciqaabta ku sheegan xubinta (j) ee Qodobka 38aad (ka saarid Jaamacadda ah) waxaa ardayga lagu xukumi karaa:

- a) Marka la raaco Qodobka 31aad xubinta (1) iyo xubinta (a) ee Qodobka 33aad ee Xeerkan;
- b) Markuu ka qayb galo, dhiiriyo abaabul iyo ka qayb-gal amar la'aan, bannaanbaxyo aan la ogolayn.

Qaybta IX.

QODOBBO MAHURAAN AH

Qodobka 43aad

Burin

Sharci ama xeer kasta oo ka soo horjeeda kan waa la buriyey.

Qodobka 44aad

Ka bilow

Xeerkan wuu hirgelayaa marka la saxiixo. Waa in lagu soo saaro Faafinta Rasmiga ah ee Dawladda.

Jaalle S. G. Maxamed Siyaad Barre
MADAXWEYNAHA
GOLAHA SARE EE KACAANKA

Jaalle Maxamed Aadan Shekh
Xoghayaha Dawladda Wasaaradda
Hiddaha iyo Taallinta Sare